

AKARERE KA GAKENKE
UMURENGE WA COKO
UMWAKA W'AMASHURI WA 2024-2025
UMWAKA WA GATATU
IKIZAMINI K'IKINYARWANDA GISOZA IGIHEMBWE 1

Amabwiriza: 1. UBAHIRIZA ITONDE RY'IBIBAZO.

2. KORESHA IKARAMU Y'UBURURU CYANGWA UMUKARA

3. GUSIBA NO GUSIRIBANGA BIFATWA NKO GUKOPERA

UMWANDIKO: Uburinganire n'ubwuzuzanye.

Uburinganire n'ubwuzuzanye mu iterambere Iterambere ni irya bose si iry'umuntu umwe, kugira ngo rishoboke, umuryango ari wo ugizwe n'umugabo n'umugore n'abana bagomba kubigiramo uruhare. Dore ko abagiye inama Imana ibasanga. Ingero ni nyinshi ariko reka turebe ingero z'imiryango ibiri ituye ku musozi wa Burimbi. Uti: «Ibayeho ite?»

Umuryango wa Cyubahiro na Kamariza bose bashakanye ari abatindi; bavugwaga ko nta cyo bakwigezaho. Bo ariko ntibacika intege kuko bahamyaga ko ibintu ari ibishakwa ntawubivukana. Dore ko bari baramenyaniye mu mahugurwa y'ubuhinzi n'ubworozi bwa kiyambere. Aho bahakuye inkunga ntagereranwa y'uburyo bwo kwiteza imbere biturutse ku nguzanyo zitangwa n'ibigo by'imari. Mu gihe bari bamaze kurushinga, rubanda rwakomeje kubaha inkwenene na bo bati : « Isazi y'ubute ntirya igisebe kandi ngo utayihinganye ntayikira». Ubwo berekeye kuri Banki y'Abaturage ya Kinyami gusaba inguzanyo maze barayihabwa.

Bwatinze gucya bashoka igishanga, maze si uguhinga karahava! Batera imbuto z'indobanure, ijuru na ryo rirabakundira. Isarura rya mbere, bishyuye icya kabiri ku nguzanyo banigurira amatungo magufi harimo ingurube n'inkoko. Ibyo byatumye benshi ndetse no mu babahaga inkwenene bibaza uko babakiranye. Ibyo byaterwaga n'uko batari bazi ibanga ryabo ryo kubahana no kugirana inama, igihe cyose bagiye gukora iyo ari cyo cyose. Haciye umwaka umwe, bibarutse abana babiri; umwe witwa Kiza undi yitwa Ishimwe. Abo bana bareranywe urukundo, bagahabwa n'ibyangombwa bikenewe nk' indyo yuzuye, imyambaro ikwiye, ubuvuzi nyabwo, amashuri meza. Usibye ibyo bakanigishwa uturimo dutandukanye maze bakura bazi ko akabando k'iminsi ari umurimo.

Ntibyatinze batsinda ikizamini cya Leta kuko biganaga ikinyabupfura n'ubuhanga ndetse n'abarimu bakabakunda birambuye. Ibyo bituma abandi bana babareberaho maze nabo biyuha akuya barabigana mu matsinda anyuranye, harimo itsinda ryo kurwanya marariya, iryo kubungabunga ibidukikije. Bamaze kurangiza amashuri yisumbuye bemerewe kujya kwiga muri za kaminuza zo mu mahanga. Kiza akurikirana ibyerekeye ikoranabuhanga naho Ishimwe we yakurikiye ibijyanye n'ubuvuzi. Nyamara nubwo kwa Cyubahiro na Kamariza hari impundu, kwa Ntambara na Nyiranuma ho hari ishavu. Dore ko babagaho ku bugenge. Uti: “Ese ibyo

bishoboka bite ko abantu babana ku bugenge boshye abatagira ubwenge?” Ntambara na Nyiranuma babanye bifashije mu buryo burunganiye, dore ko bavukaga mu ngo zidasaba umunyu kandi na bo bararangije mu Ishuri Nderabarezi rya Byumba.

Ntibyatinze bibarutse ubwa mbere abana b’impanga: Semanywa na Keza. Babareze bibabaje kandi biteye agahinda kuko ntibasibaga kurwana kubera ubusinzi bwa buri muni. Wasangaga Ntambara na Nyiranuma baramukira mu kabari kari hafi y’ishuri, kwiwandikisha ngo bazishyura ukwezi gushize. Ubwo kandi na nyuma y’amasomo, wasangaga utubare twose, ni nde uciye hano ni Runaka, iyo atabaga umugore yabaga umugabo. Guteka byabaga rimwe ku muni nabwo nijoro, akenshi abana baryamaga batariye maze bwacya bakarwanira mu nkono batabanje no kwikiza ubutuna. Igihe cy’amanywa abana babo birirwaga mu ngo za rubanda, rimwe bakabaha ibyo kurya ubundi bakabibima. Hari ababahaga urw’amenyo babavugiraho ngo: “Ariko ubundi aba ko ari abo kwa mwarimu, turabagaburira utw’abana bacu hanyuma bage kurenzaho amata n’imigati, ubwo si ubucucu?” Bamwe bakabibaha abandi bakabibima. Nyamara se babibonaga ryari? Ubwo abana bakirirwa bicira isazi mu jisho.

Ntibyatinze, basezerewe ku kazi kubera imyitwarire mibi idahwitse haba hanze ndetse no ku kazi (gusiba ku kazi, kudatanga umusaruro, kurwana no gusebanya). Udufaranga tw’imperekeza twabaye intica ntikize. Baturiyeye nk’abagiye gupfa. Koko rero ntarutamburira imfusha. Umunsi umwe hagwa imvura y’amahindu, abana benshi bugama aho kubera ko bari bataye urufunguzo ikindi kandi no guhora bahahanwa n’abaturanyi, byatumye bajya kwikinga muni y’igiti cyari ku irembo ry’iwabo.

Muri iyo mvura nibwo Keza yafatwaga n’umusonga ariko undi ntiyabimenya agira ngo ni ugukina. Uko amasaha yagendaga akura ni na ko yarushagaho kuremba maze atangira kubwira umuvandimwe we ko apfuye. Ubwo Semanywa ahuruza abaturanyi ngo bamujyane kwa muganga. Bamwe bumva umwana bwangu ariko abandi bati: “Tujya kubayegamo ngo kwa muganga se, ababyeyi babo ntibari kunywera iza yose hirya aha, hari uwo bagurira agacupa?” Bakiri muri izo mpaka, hatunguka Cyubahiro na Kamariza bavuye kubaza ibyerekeye imishingirwe n’imikorere y’amakoperative, babona umwana yarembye maze batumiza ipikipiki bamujyana kwa muganga. Bamugejeje, batinze kumwakira kuko nta n’ubwishingizi mu kwivuka bagiraga. Muganga aramusuzuma maze ababwira ko hasigaye akuka gake. Nyuma y’umwanya muke Keza araca.

Inkuru y’inshamugongo ihita ikwira hose ko umwana wa Ntambara na Nyiranuma yitabye Imana. Abantu barababara cyane kubera ko abana bazize uburangare bw’ababyeyi babo dore ko babahamagaye ko abana bari hanze kandi banyagirwa bakabatera utwatsi. Imihango yo gushyingura iba

bose bose bacitsemo igikuba, bashinjaga Ntambara n'umugore we urupfu rw'umwana wabo kuko impanga ye yari yabibasobanuriye. Nyirnuma we amarira yari yose, bamwe bakamuhoza abandi bakamuha inkwenene. Ubwo abahacaga bose bifataga ku munwa.

Nuko ishyingura rirangiye, Cyubahiro yahise asaba ijamba, aravuga ati: "Ibi bikwiye gusubirwamo, abantu bakibutswa inshingano zabo haba mu ngo ndetse n'ahandi". Nibwo basabye umuhuzabikorwa w'umurenge gutumiza inama y'ikubagahu ngo bafatire ibintu hafi amazi atararenga inkombe. Muri icyo nama Cyubahiro na Kamariza bahawe umwanya basobanurira abantu ibintu byinshi bamaze kugeraho kuko bari bamaze kubazwa ibanga bakoresha. Banababwiye n'ibyo bateganya kugeraho mu minsi iri imbere ariko kandi ko ibyo byose babigezwaho n'ubwumvikane no kujya inama ku kibazo cyabangamira umuryango.

Ibinaniye umwe undi akabikora. Nubwo bari mu bwirabure ntibyatumye abaturage bihangana kubaha amashyi y'urufaya. Abari aho batahana ingamba nshya cyane cyane ku bibazaga icyo bakora ngo batere imbere. Nyirnuma na Ntambara bahise basaba abaturage bese imbabazi ndetse bazisaba n'Imana, bafata ikemezo cyo gusenyerera umugozi umwe. Wumvaga bamwe hirya bavugaga ngo: "Harakabaho Cyubahiro na Kamariza"; abandi ngo: "Izina ni ryo muntu!"

I. IBIBAZO BYO KUMVA UMWANDIKO /10.5

- 1) Ni iki Kamariza na Cyubahiro bakoze ngo barwanye ubukene?/ 2
- 2) Ni ikihe gikorwa cy'ubutwari Nyirnuma na Ntambara bakoze imbere y'abaturage bagenzi babo?/2
- 3) Imibereho ya Cyubahiro na Kamariza bayikeshaga iki abantu batari bazi?/2
- 4) Abana ba Cyubahiro na Kamariza ni ba nde? Barezwe bate?/2
- 5) Ni irihe somo ry'ubuzima bwa buri muni wakwigira kuri iyi miryango yombi?/2.5

II. IKIBONEZAMVUGO /52.5

1. Vuga ubwoko bw'amagambo aciyeho akarango. /12

- a) Burya ibyuya tubira iyo turi muri siporo na byo ni imyanda umubiri ukenera gusohora.
- b) Ni byiza kwitabira imyitozo ngororamubiri tukiri bato.
- c) Nabonye umwana urusha ubunini abantu bakuru benshi.
- d) Ibihingwa ngandurarugo bifite akamaro kanini.
- e) Ryangombe rya Babinga mwene Nyundo.
- f) Umwami arababwira ati: "Nta kindi kishe umugore wawe."
- g) Mu byiza bitatse u Rwanda harimo imisozi iteye ubwuzu ari iminini n'imitoya.
- h) Noneho amakosa yakoraga akikuba inshuro nyinshi.

i) Abana babiri bari mu kindi cyumba.

2. Garagaza intego y'amagambo aciyeho akarongo n'amategeko y'igenamajwi yubahirijwe. / 14.5

- a) Kwitabira amasomero ni byiza.
- b) Twabonye mu mpande zose.
- c) Nabonye imfizi irisha mu rwuri.
- d) Umushoferi asetse yambaye ishati afite na terefone.
- e) Nyiri umurima aba ari cyo asangamo.
- f) Dukunze ibyiza dukesha imisoro.
- g) Gukwa no kunywa birajyana.
- h) Kwengesha amazi y'imvura si byiza.

3. Andika inteko ku mazina ,ku binyazina na ngenga ku nshinga. /5

- a) Uhageze abona amashyuzi apfufunuka mu nkengero zacyo.
- b) Iyo werekeje i Rusizi unyura mu cyanya ...
- c) Mu buzima ni ngombwa kwihangana aho turi hose.
- d) Mwe mutegure irushanwa neza ,ibindi bizaza.
- e) Mu bitanga imboga twavugaga byinshi.

4. Andika ibicumbi by'amagambo aciyeho akarongo. /5

- a) Kureba ibirunga usanga bitangaje.
- b) Hari amoko y'ibiti n'ibindi bimera.
- c) Karake apfa kugenda aseta inzira ibirenge.
- d) Nyamwasa aramushima ,aramurongora bagira ubukwe bwiza cyane.
- e) Urugo rwe ntirwamuhiriye.
- f) Ibigori biribwa bitaruma.

5. Tandukanya amagambo yandikwa atya ukoresheje ubutinde bw'imigemo n'imiterere y'amasaku. /5

- a) Inzuzi(batera)..... # (imigezi)
- b) Amasoko (y'imigezi)..... #..... (Aho bagurira imyaka)
- c) Kubaza (ibibazo).....#(imbaho)
- d) Agatama (ikinyobwa).....# (itungo)
- e) Ubwenge(ubuhanga).....#.....(utwobo)

6. Garagaza ubutinde n'amasaku ku migemo y'interuro. /5

- a) Birazwi ko kwitabira amasomero bituma umuntu asobanukirwa,akamenya ibintu binyuranye.

7. Andika neza amagambo akurikira. / 2

- a) Ni mu goroba
- b) Sambiri

8. Andika amagambo abiri arimo igihekanze "ndy"/2

9. Uturegeka dukoresheye ryari? Tanga urugero. /2

III. UBUMENYI RUSANGE BW'URURIMI/22

10. Tandukanya insigamigani nyirizina n'insigamigani nyitiriro. /4

11. Vuga ingeri 4 z'ubuvanganzo bwo muri rubanda. /2

12.Uzuza imigani migufi. /5

- a) Agasozi kamanutse inka.....
- b)kamwera akandi kuzakamwa.
- c) Usoroma ibimusumba
- d).....kakabikwa kure.
- e)Nta rutundo

13. Koresha izi nshoberamahanga mu nteruro./2

- a)Kugwa agacuho.
- b) kujya kwa Ngara

14.Ica ibisakuzo: Sakwe Sakwe!!!/4

- a) Hagarara hakurya mpararare hakuno turate abeza.
- b) Ndaguteruye ndakwesa,urahindukira urandeba.
- c)Nubatse urugo hejuru y'urupfu.
- d)Nkeje umwami wo mu kirere,angabira ibiryoshye.

15. Koresha amagambo yabugenewe. /5

- a)Inyoni nyinshi bazita
- b)Abantu benshi cyane tubita
- c)Igikeri ntikivuga ahubwo
- d)Umusambi ntuvuga ahubwo
- e)Igishabo ntikimanikwa ahubwo

16. IHANGAMWANDIKO/15

Andika kuri iyi nsanganyamatsiko“INGARUKA Z'IBIYOBWENGE”.
Ntujye muni y'imirongo 25 ugaragaze ingingo 4 zishyigikira ibitekerezo byawe.

MUZAGIRE NOHERI NZIZA N'UMWAKA MUSHYA MUHIRE WA

2025!!!!!!!!!!!!